

Pilipinas Kong Mahal With All the Overcoat

Dulang May Isang Yugto

Unti-unti nang natutupad ang pangarap ng magkaibigan na Nato at Ambet para sa kanilang website na dikasure.com. Dumadami na ang mga kliyenteng nagpapasulat sa kanila ng viral articles at pumapalo na rin sa ito advertisements.

Isang gabi, umuwi si Ambet sa kanilang apartment/office para kumbinsihin si Nato na itigil na nila ang kanilang negosyo sa paniniwalang sinisira ng website ang kamalayan ng kanilang mga mambabasa. Kasabay nito ay ang pagdating ng tatlo nilang kliyente. Una ay ang talent manager na nagpapa-edit ng false historical love letter para sa promotion ng bagong pelikula ng kanyang mga alaga. Ikalawa ay ang minitro ng Iglesia ng Hari (INH) na nagpapaedit ng pinasulat na viral article ukol sa kanilang grupo upang pagtakpan ang mga kontrobersiyang kinasasangkutan ng INH. At ikatlo ay ang sekretarya ng Congresswoman ng Ilocos na nagpapasulat ng isang lathalain na magpapabango sa pangalan ng mag-asawang Marcos.

Sa gitna ng pakikipagtransaksyon nina Nato at Ambet sa kanilang mga kliyente, painit nang painit ang kanilang bangayan ukol sa pagsasara o pagpapatuloy sa negosyo. Maingat na tinitimbang kung ang kapangyarihan na mayroon ang kanilang website ay bumubuo o nangwawasak ng kamalayan at pagkamulat ng kanilang mga kababayan.

Pilipinas Kong Mahal With All the Overcoat

Dulang May Isang Yugto

MGA TAUHAN

AMBET	mid 20's, mukhang nerd at mabait
NATO	mid 20's, maangas ang dating
KLIYENTE	gaganap sa tatlong iba't ibang customer nina Ambet at Nato
LALAKI	body guard ng isa sa tatlong kliyente

TAGPUAN

Magaganap ang dula sa maliit na apartment na nagsisilbing opisina nina Ambet at Nato.

Makikita sa entablado ang dalawang magkahiwalay na mesa na kinalalagyan ng tig-isang laptop at printer. Tambak ng papel at ilang libro ang parehong working desk. May isang mas maliit na mesa kung saan nakalagay ay isang bote ng fresh milk, canisters ng kape, asukal, at creamer, at ilang baso at tasa. Sa likod ng working desk ni Nato ay may book shelf na puno ng history at literary books. Sa sahig ay may nakakalat na kahon na puno din ng mga papel. Ang pinto sa kaliwa ay palabas ng apartment. Ang pinto naman sa kanan ay papasok sa kwarto kung saan naroon din ang CR. Pasado alas siete na ng gabi. Kasalukuyan.

ANG DULA

Pagbukas ng ilaw, makikitang nakaupo si NATO sa harap ng mesa niya. May hawak siyang papel. Titig na titig siya sa nakasulat dito.

NATO

Ibang klase talaga 'tong si Ambet. Likot ng utak!

Inom ng gatas si NATO sa basong nakapatong sa mesa niya, tapos ay magkakaroon ng aha moment. Haharap siya sa laptop at magpapatugtog ng makabagbag damdaming instrumental music. Marubdob niyang babasahin ang nakasulat sa hawak na papel.

NATO

Mil ochocientos noventa y siete. Mahal kong Oryang, mali ka. Hindi kita nakasalubong upang sa dulo ng kalsada, ako ay liliko sa kanan at ikaw sa kaliwa. Sapagkat saan man tayo dalhin ng ating pakikibaka, ikaw lang ang aking itatangi at makailang ulit na ihaharap sa pulang bandila. Hindi tayo nagpalitan ng mga kwento upang sa pinakahuling tuldok ng pangungusap, ang karugtong ay alingawngaw ng katahimikan. Walang pagod kitang aawitan ng himnong pambayan, Oryang. Hindi kailanman ako mauubusan ng salita upang maialay sa iyo bilang mga tula. Maging ang bulong at buntung-hininga'y magpapahayag ng pagsinta sa tulad mong umiibig din sa bayan. *(mapapatayo dahil nadadala sa binabasa)* Hindi tayo sabay na tumawa, nagkatinginan, at tumawa pa nang mas malakas, upang sa paghupa ng halakhak ay may butil ng luha na mamimintana sa ating mga mata. Loobin man ng Maykapal na pansamantala tayong magkawalay, tandaan mong ang halakhak at sigaw ng ating mga kasamahan ay sa akin rin. Hindi ka dapat masabik sa akin sapagkat ako'y mananatili sa iyong piling. *(labis na kikiligin)* 'Tang ina ka talaga, Ambet!

Saktong pasok naman ni AMBET.

AMBET

Mura agad? Wala man lang beso-beso?

NATO

Gago! Napapamura ko sa ganda nitong gawa mo. Dali, ikaw ang magtuloy! (*ituturo kung saan siya tumigil sa pagbabasa*)

AMBET

Ayoko! Ang baduy nyan!

NATO

Dali na! Saya yung music oh, matatapos na.

AMBET

(kukuhain ang papel, babasahin nang mabilis) Hindi kita niyakap nang ilang ulit upang sa pagkalas ng mga braso ko sa'yo ay maramdaman mong iniwan kita. Habambuhay akong magiging tapat sa ating panata, Oryang. Kapara ng binitiwang kong sumpa sa ngalan ng bayan, tayo'y mananatiling katipun, kawal, at bayani ng ating pagmamahalan.

NATO

Lagyan mo naman ng feelings, tol. Para namang hindi si Bonifacio yung nagsasalita eh.

AMBET

(sasakyan ang trip ni NATO) Hindi tayo bumuo ng mga alaala upang sa muli mong paggising ay maisip mong hindi tayo nagkasama sa pakikidigma. Hindi ko man hawak ang bukas, nais kong tanganan mo ang aking pangako na ilang ulit kong pipiliing mabuhay at pumanaw upang patunayan sa iyong mali ka. Hindi ako bumati sa simula upang sa huli ay magpaalam.

AMBET/NATO

Ikaw ang aking bayan. Nagmamahal, Andres.

NATO

Nakanampakshet! *(aagawin ang papel)* Bilib talaga ko sa'yo, tol. Sa'n mo hinugot 'to?

AMBET

Para yan sa crush ko nung college. Tinweak ko lang para magmukhang para talaga kay Oryang.

(lalapit sa mesita, iinom ng gatas)

NATO

Pero yung footnote talaga yung nagpa-astig sa sulat na 'to eh. *(babasahin ang footnote)* Ibinigay ni Julio Nakpil ang liham na ito kay Oryang ilang gabi makalipas ang pagpaslang kay Andres sa Maragondon. Bangis! E di ba si Nakpil yung ipinalit ni Oryang kay Boni?

Tatango lang si AMBET. Halatang walang gana.

NATO

Ikinaganda ni Oryang 'to, tol. Ikinaganda rin ng Facebook page ng dikasure.com. Hanggang ngayon andami pang nagla-like at nagshe-share. Kita mo?

AMBET

Kahit ano naman yatang tungkol sa pag-ibig, pinagpepyestahan sa FB.

NATO

Nabasa mo yung mga comments? (*natatawang babasahin ang comments sa laptop*) Hashtag galawang supremo... Daming feels. Kilig much... Anakan mo 'ko, Andres... Si Bonifacio ang tunay na hokage... Hats off talaga ko sa'yo, tol. Huling-huli mo'ng kiliti ng mga babaeng 'to, oh. High five!

Hindi sasagutin ni AMBET ang high five ni NATO. Umiling-iling na iinom ng gatas.

NATO

KJ mo naman. Di mo man lang tapatan yung energy ko. May problema ba? (*hindi iimik si AMBET*) Huy, Ambet! Ano'ng problema mo?

AMBET

'Yan ang problema ko. 'Yang mga comment na binasa mo.

NATO

Bakit? Ayaw mong pinupuri ka? E hindi naman ito first time na nag-viral yung sinulat mo ah.

AMBET

(iinom ng gatas) Naba-bother na ko, Nato.

NATO

Naba-bother saan?

AMBET

Na maraming naniniwala na totoo yung mga article na nilalabas natin sa website. Kagaya nyan.

Akala ng mga tao, legit na sulat 'yan para kay Oryang.

NATO

Eh 'di ba yun naman ang goal ng dikasure.com? Magpublish ng historical fiction at listicles na patok sa market natin.

AMBET

Pero hindi kasama sa goal ang paniwalain ang mga tao sa mali.

NATO

Tol, alam nila na fiction ang content ng website natin. For entertainment lang.

AMBET

Hindi lahat nababasa yung disclaimer natin. Yung iba kahit nabasa man nila, iniisip pa rin na

totoo yung laman ng mga article. Most of all, marami sa kanila, walang idea kung ano ang historical fiction.

NATO

Hindi na natin problema yun, Ambet.

AMBET

Problema natin! Nagpapakalat tayo ng maling impormasyon. Ng maling history.

NATO

Teka nga. Sa'n ka ba nag-dinner at biglang pagbalik mo dito eh may ganyan kang realization?

Sino ba'ng kasama mo kumain? Si Buddha?

AMBET

(iinom ng gatas) Nung isang linggo ko pa 'to iniisip. Nung I-release natin yung throwback article na quotable quotes ni Kris Aquino nung inamin niyang nagka-STD siya dahil kay Joey Marquez.

NATO

Tol, ano namang kinalaman nun? E nilista mo lang naman yung mga pamatay na birada ni Kris?

Teka, nasan ba yun? *(hahanapin sa mesa ang draft ng article)*

AMBET

Lahat ng nakasulat dun, hindi totoo.

NATO

(makikita ang papel) Oh, eto. Talaga namang sinabi ni Kris 'to sa interview. Number 1, “I grabbed his genitals. I wanted to crush it. I told him, ilang beses mo ba ako kailangang gaguhin?” 'Tang ina, baog na siguro si Manong Joey. Number 2, “Ang dami ko nang tiniis in the name of loving Joey. I'd be a liar if I said I don't love him anymore.” O 'di ba, verbatim naman 'tong lines na 'to? Number 3, “I'm angry because I loved him with all my heart. Ibinigay ko ang lahat. Hindi niya na-control ang temper nya. Hindi mo gagawin 'yan sa anak ng isang taong in-assassinate.” Oh, alin ang hindi totoo dito?

AMBET

Hindi si Joey ang nanghawa ng tulo kay Kris. It's the other way around.

NATO

Saang tabloid mo naman nasagap 'yan?

AMBET

Sinabi sa'kin nung driver ng Uber na nasakyan ko last last week yata. Siya raw ang teacher noon ni Kris sa driving lessons. Narinig daw niya mismo si Kris na nagkekwentong sa isang kaibigan niya na may STD siya.

NATO

Ambet naman! Ba't ka naniniwala sa driver ng Uber?

AMBET

Ikaw, ba't naniniwala ka kay Kris?

NATO

Wala akong sinabi na naniniwala ako kay Kris. Ang importante sa'kin, nagbayad sila para ilabas yung article para mapromote yung nakakadiring remake ng Pido Dida.

AMBET

That is exactly my point, Nato. Ipinagpapalit natin sa pera ang katotohanan. To think na showbizz scandal pa lang 'yan. Pa'no pa yung sinusulat natin tungkol sa Philippine history? Perfect example 'tong love letter kuno ni Bonifacio.

NATO

Yes! Perfect example 'yung love letter na yun ng isang bagay na magpapalakas sa negosyo natin. Narinig mo? NEGOSYO... NATIN. Crineate natin ang dikasure.com para kumita. Hindi para magturo ng Social Studies.

AMBET

Ganun na lang ba 'yun?

NATO

Sa ngayon, Ambet, oo. Ngayon pa nga lang natin nararamdaman na may income tayo sa website.

Nakabili na tayo ng sariling domain. Nakakapag-boost na tayo ng post sa Facebook. We are on our way now sa pinangarap nating jackpot.

AMBET

Pero, Nato, kahit kailan ba 'di mo naisip na may social obligation tayo? Sa lagay ng Pilipinas ngayon, 'di ba dapat nagko-contribute tayo sa pagtataguyod ng katotohanan?

NATO

(yuyugyugin si AMBET) HUY! Si Ambet ka ba talaga o may sapi ka ni Efren Peñaflorida? 'Di mo dapat iniisip 'yang mga 'yan. Ang isipin mo, padami na nang padami yung ads natin sa website. *(lalapit sa laptop)* At itong FB page natin, kasing ami na ng likes ng Kapuso Mo, Jessica Soho. 6,074,905! Imagine mo yun, tol? Kasing sikat tayo ni Madam Jessica.

AMBET

6,074,905 ding tao ang lolokohin natin.

NATO

Followers ang tawag dun. Isipin mo, ha. 'Di hamak na mas maraming likers ang page natin kesa sa combined likers ng page ng National Historical Commission of the Philippines, National Commission for Culture and the Arts, at Official Gazette of the Republic of the Philippines. Ibig sabihin, mas gusto tayong basahin ng mga tao.

AMBET

Yun nga ang point ko. Dahil tayo na ang sinusundan nila, hindi ba tama na we give the truth they deserve?

NATO

Ayaw nila ng truth. Masakit kasi yung truth. Kaya nga sakay na sakay sila sa pag-roromanticize natin ng history. Yun ang gusto ng mga Pinoy — drama.

Hindi makakaimik si AMBET. Mararamdaman niya ang paghilab ng tiyan.

NATO

(titingin sa wristwatch) Mag-a-alas otso na. Magtrabaho na tayo. Ang dami nating 12 midnight deadline.

Uupo si AMBET sa harap ng laptop niya. Tititigan lang niya ang screen. Halatang naiinis.

NATO

(nagbabasa sa laptop) Uy, interesting 'to! Mini festival ng mga play tungkol sa Martial Law.

Nood tayo! Sigurado, marami tayong makukuhang materials dito.

AMBET

(nakatitig pa rin sa screen) 'Di ba sabi ko, hindi magpapublish ang dikasure.com ng kahit anong may kinalaman sa Martial Law.

NATO

Ay, oo nga pala. Sorry, tol. (*saglit*) Pero malay mo, tol. Baka may isang play dun na tungkol sa lolo't lola mo.

Hindi iimik si AMBET.

NATO

Back to work na nga muna.

AMBET

(*biglang tatayo*) Nato, napapanaginipan ko na sina Cory at Ninoy. Si Ninoy habang nakapangalumbaba, bigla akong pinakyu. Si Cory naman, naka-Laban sign siya nung una. Tapos biglang itinutok niya sa'kin yung daliri niya. Sabi niya — rei gun!

Pagtatawanan ni NATO si AMBET.

AMBET

Wag mo kong tawanan. Seryoso 'yun, tol. Feeling ko, nagagalit na sila sa ginagawa natin.

NATO

(*lalapitan si AMBET, sasalatin ang leeg at noo*) Stressed ka ba? Over fatigue? Umidlip ka kaya muna.

AMBET

Hindi mo ba naexperience yun? Walang bayani o presidente na nagpoprotesta sa panaginip mo?

NATO

Umayos ka nga! Kagaguhan 'yang sinasabi mo. Tingin ka sa paligid mo. Nakalipat tayo sa fully furnished at sound-proof na apartment dahil sa negosyo. 'Yung laptop mo, nakabili tayo ng bago after nating isulat yung kunwaring suicide note nung anak ni Miriam Santiago. Sumalangit nawa ang kaluluwa nilang dalawa. Yung mga mesa natin, napundar natin 'yan after mapublish yung gawa-gawang sulat ni Antonio Luna kay Nelly Boustead. At yung weekly supply natin ng fresh milk, dahil 'yan sa pagsulat natin ng anecdote ni Melchora Aquino na nagpapabreastfeed siya sa mga anak ng mga Katipunero. Kapag lumakas pa lalo ang website natin, makakarenta na rin tayo ng maayos na opisina. Naiisip mo ba 'yun?

AMBET

Mali ang ginagawa natin. Yun ang tumatakbo sa utak ko.

NATO

'Wag mong i-entertain 'yan. Ang isipin mo, nakakapagbigay ka sa parents mo ng pera. Nabibigyan mo ng allowance yung kapatid mong high school. Napaayos mo na nga yung kusina at CR nyo eh. Dahil yun lahat sa dikasure.com. Ngayon pa ba tayo hihinto? Naka-take off na tayo, tol.

Magriring ang cellphone ni AMBET. Agad niyang ika-cancel.

NATO

(lalapit sa laptop) Sa sobrang successful ng website natin, may nanggagaya na. (ihaharap kay AMBET ang laptop) Ito oh, sulatingbayan.com. Yung binanggit ko sa'yo last time. Gayang-gaya yung format natin. 'Tang ina 'tong Teody Agoncillo na 'to. Walang originality.

Magriring ulit ang cellphone ni AMBET. Hihilab ang tiyan niya.

AMBET

Teka lang, Nato. Banyo lang ako.

Nagmamadaling papasok sa CR si AMBET. Haharapin ulit ni NATO ang laptop. Mayamaya, may kakatok nang pagkalakas. Agad itong pagbubuksan ni NATO. Si KLIYENTE 1 ang kumakatok. Bakla, ka-tipo ni Alfie Lorenzo. May dalang dalawang kahon ng pizza.

KLIYENTE 1

Buenas noches, hijo guapito! *(bebeso kay NATO)*

NATO

Oh, Tito Alfie. Gabi na ah. Ano po'ng sa'tin?

Tuloy-tuloy sa pagpasok si KLIYENTE 1, direktso sa mesita para ilapag ang dalang pizza.

KLIYENTE 1

Maaga kasing nag-pack up sa shoot. Eh malapit lang dito ang location kaya naisip kong bumisita. Ayan, pizza. ‘Yung may sangkatutak na pinya-ple. Pa-thank you sa magandang serbisyo ninyo ni Ambet.

NATO

Kumusta nga po pala ang feedback ng management dun sa sinulat nating article para sa comeback movie ng The Hunks?

KLIYENTE 1

Palung-palo yung write-up nyo! Ambilis umingay nung BeKi-K-K. dahil dun sa pinublish nyong kunyaring sulat. (*kakain ng pizza*) Uy, kain.

NATO

Si Ambet po ang dapat purihin nyo. (*kukuha ng pizza*) Sa kanyang idea po yung acceptance letter ni Bonifacio para sa beking katipunero.

KLIYENTE 1

Nakakaantig kasi talaga! Eto nga at nagprint pa ko ng kopya para ma-share ko sa mga amiga. (*kukunin sa bulsa ang sulat at madamdaming babasahin*) Marso 12, 1897. Kasamang Iban, wala nang dapat ilihim. Wala nang dapat ikatakot. Ang namamagitan sa inyo ni Guillermo ay isang mukha ng pagmamahal sa bayan na hindi dapat itatwa. Bagkus, ito ay marapat na ihayag at taas noong ipagmalaki. ANG BOBONGGA NG WORDS! Itatwaaah... Ihayuugh... Parang hinalukay

sa baul. *(itutuloy ang pagbabasa)* Napagpulangan na sa Camara Negra ang inyong paghahapag. May mga pagtutol man, nanindigan sina Pingkian at Kitlat na ang pinili ninyong landas ay hindi naman salungat sa isinusulong ng samahan. KABOG! Well-researched talaga. Best in Sibika at Kultura! *(itutuloy ang pagbabasa)* Kayo ni Guillermo ay hindi naiiba kaninuman. Taglay ninyo ang parehong giting at tapang na kayang pumunit ng cedula at humarap sa talim ng bayoneta. Ito ang simula ng tunay na kalayaan. Hinhintay ka ni Guillermo sa Calle Benavidez. Ang inyong supremo, Maypagasa. ANTARUSH! Mga beking katipunero na nagtatanan!

NATO

For sure, magba-box office ‘yang Beki-K-K!

KLIYENTE 1

Magdilang anghel ka sana. Laking tulong talaga nitong website nyo eh. Kabog! At least ngayon ‘di ko na kailangang mag-imbento ng kung anik-anik na expose para lang mainterview yung mga alaga ko.

Maririnig ang sigaw ni AMBET mula sa CR. Humahangos siyang lalabas, nagtataas pa ng shorts.

AMBET

Nato!!! Grabe yung tae ko! Kahugis ng mukha ni Jose Rizal! Kamukhang kamukha!

KLIYENTE 1

Ang sarap naman! Sarap ng pizza oh!

AMBET

Ayy sorry po!

KLIYENTE 1

Kain ka, hijo. Mukhang nalipasan ka na ng gutom.

NATO

Ambet, tuwang tuwa si Tito Alfie dun sa sinulat mo para sa movie ng The Hunks. ‘Pag sinwerte, baka kunin ka ng writer ng Star Cinema.

KLIYENTE 1

Hindi imposible yan. Lalo na kung mas gagalingan mo sa susunod kong ipapagawa.

AMBET

Ah... Hindi na po kasi ako—

KLIYENTE 1

Ipinasok kasi sa pelikula si Bea Alonzo. Siya yung gaganap na Gabriela Silang. Naisip ko, maganda kung gagawa ulit tayo ng viral letter. Pero this time, tibuan naman. Kunwari, may fellow katipunera na kapompyangan itong si Gabriela. O di ba, parang true-to-life story ni Bea? Keri ba ‘yun, ha Ambet?

AMBET

Ano kasi, Tito Alfie... Baka makarma na tayo ‘pag dinagdagan pa natin yung pagsisinungaling. Baka mag-flop yung pelikula, sige ka.

KLIYENTE 1

Naku, takot lang sa’kin ng malas! Kakampi ko ang Diyos!

AMBET

Kaso, marami pa tayong pending, ‘di ba Nato?

KLIYENTE 1

Okay na, Ambet. Chicken lang naman daw yung request ko sabi ni Nato. Don’t worry, irerekomenda kita sa mga bossing ng Star Cinema. O pa’no? Iwan ko na ‘yang pizza. Pagbalik ko, catering na ang dala ko. *(bebeso sa dalawa)* See you, mga hijo guapito.

Lalakad palabas si KLIYENTE 1.

NATO

Tito Alfie—

KLIYENTE 1

Yes?

NATO

Um... bakla po ba talaga si Papa P?

KLIYENTE 1

(matatawa) Naku, panoorin nyo ‘tong Beki-K-K at kayo na ang humusga. Babush!

Tuluyang lalabas si KLIYENTE 1.

AMBET

Ba’t tumanggap ka na naman ng panibago?

NATO

May additional na bayad naman ‘yun. Tsaka ‘di naman urgent.

AMBET

Hindi mo ba gets yung concern ko? Ha, Nato? Na hindi na ko sigurado sa ginagawa natin.

NATO

You’re quitting?

AMBET

I’m considering.

NATO

So seryoso ka talaga dun sa pinagsasabi mo kanina?

AMBET

Mukha ba kong nagjo-joke?

NATO

Oo! Kasi malaking joke yung reason mo na niloloko ng dikasure.com ang mga tao. Ang tagal nating kinonceptualize nung website, tapos ngayon mo lang maiisip ‘yan?

AMBET

Kasi ngayon totoo na siya. Technically, nagmamanipluate na tayo ng consciousness ng tao. That’s what bothering me.

NATO

Nasa’n na yung Ambet na excited sa lahat ng x-deal at contract na pinirmahan natin? (*kukuhanin sa desk niya ang makapal na pile ng papel*) Ayan! Nasan yung Ambet na kating-kating magsulat para sa lahat ng kliyente?

AMBET

Pwede naman nating itermiante ‘yang mga kontratang ‘yan, ‘di ba?

NATO

Lasing ka ba? O durog?!

AMBET

Pa'no kung talagang ayaw ko na?

NATO

Ambet, may kontrata ka. May kontrata tayo. Negosyo 'to, hindi laru-laro na pwedeng ayawan na lang bigla.

Saglit na katahimikan. Kukuha ng panibagong baso ng gatas si NATO, iinom.

NATO

Ano ba talagang nangyayari sa'yo? Para kang nadwende na all of a sudden naalog ang utak.

AMBET

Yung— yung pamangkin ko kasi.

NATO

Ano namang meron sa pamangkin mo?

AMBET

Nagalit sa'kin dahil nung may assignment sila sa HEKASI na sino si Jose Pidal, nag-Google siya.

Nakita niya yung article sa website natin.

NATO

‘Yung pinasulat ng tauhan ni GMA nung last election? Oh, ikaw gumawa nun, ‘di ba? Ang daming shares nun.

AMBET

Ang sabi ko sa article na ‘yun, si Jose Pidal ay imaginary friend ni Ping Lacson na hindi niya na-outgrow. Na yung money laundering case na ibinabato kay Mike Arroyo nung 2003 ay hallucinations lang.

NATO

Kasi binubulungan si Ping nitong si Jose Pidal na mukhang sorbetes na nagkatawang tao? ‘Yun ba ‘yun?

AMBET

Oo. ‘Yun ang sinagot ng pamangkin ko sa homework niya. Confident pa siya sa sagot niya dahil alam niyang ako mismo ang source. Kaya nung nag-recite siya, pahiya siya sa buong klase.

NATO

(pipigilang matawa) E bakit kasi hindi mo tinuruang mag-research sa Internet yung bata? Meron naman Wikipedia!

AMBET

Hindi ‘yun ang issue. Nato, nakakagulo na tayo sa pag-aaral at pagkatuto ng mga bata.

NATO

Tol, ‘wag mong icomPLICATE yung nangyari. Hindi lang talaga marunong mag-Google ‘yung pamangkin mo.

AMBET

Pupusta ko, hindi ito isolated case. Malaki ang probability na marami pang readers natin ang sobrang misinformed na.

NATO

At gusto mong itigil ‘yung pinagkakakitaan natin para sa “probability” na ‘yan? Bakit, magiging informed ba silang lahat kung hindi nag-eexist ang dikasure.com?

AMBET

‘Wag kang mamilosopo!

BATO

Ambet, maraming bobong Pinoy.

AMBET

‘Yun na nga eh. Bakit hindi natin sila turuan ng tama? Ng totoo para hindi sila maging bobo.

NATO

May sumubok na. Marami na, tol. Pero ano? Binoto pa rin nilang senador si Pacquiao at yung manyak na si Sotto. Congressman pa rin si Gloria. Mayor na ulit si Erap.

AMBET

May magagawa tayo para may magbago.

NATO

Hindi ka sure.

Magriring ang cellphone ni AMBET. Matatagalan bago niya ma-cancel ang tawag.

NATO

Sino ba 'yan? (*iiinom ng gatas*) Ba't ayaw mong sagutin?

Hindi sasagot si AMBET. Patay malisya.

NATO

Pwede na ba tayong magtrabaho?

AMBET

Wala na kong ganang magsulat.

Kakikitaan ng pagkapikon si NATO pero susubukan pa rin niyang kumalma.

NATO

Ambet, nalimutan mo na ba kung bakit natin naisip i-launch ang website?

AMBET

Para yumaman?

NATO

Gago! Kasi gusto natin magsulat. Gusto nating mabasa ng iba yung mga gawa natin. Sabi mo pa, “Fuck Visprint! Fuck Psicom! Fuck Anvil! Kung ayaw nila tayong i-publish, magpublish tayo on our own!” Ito na ‘yun, tol. Nagagawa na natin. Well thanks to my computer programming prowess. (*matatawa*) ‘Di ba dapat happy ka?

AMBET

Hindi ko sinabing hindi ako masaya. Sabi ko, naba-bother ako, nagi-guilty.

NATO

Isipin mo rin kasi yung other side of the coin. Gusto rin naman ng mga followers natin ‘yung nababasa nila. Tanda mo, bentang benta ‘yung sinulat nating love story nina Gregorio del Pilar at Dolores Jose? Ang dami nating napakilig dun sa kwento ng panyong may burdang Dolores na nakuha sa bangkay ni Goryo. Tapos ipinasok mo pa si Neneng Rodrigo, ‘yung the one that got

away ni Goryo. Ang saya-saya mo nun dahil feeling mo, ang dami na nating fans. (*saglit*) Ang dami pa nating gustong isulat.

AMBET

May ibang paraan pa naman para maging writer.

NATO

Ano, babalik tayo sa pagpoproduce ng chapbook? Magsusulat tayo sa Wattpad?

AMBET

Why not?

NATO

Neknek mo! Kundi Wattpad, ano? Magvideo na rin tayo ng makalaslal pulsong tula?

AMBET

Kaya rin natin 'yun.

NATO

Gago! Ayoko nga kay Sara at Phil Kaye, 'di ba?

AMBET

Sumubok ulit tayo sa publication. Mas magaling naman na tayo ngayon.

NATO

At 'di hamak na mas marami tayong kikitain dito sa dikasure.com kesa sa pagpapublish sa Liwayway at sa mga textbook ng Vibal.

AMBET

Eh 'di magpasa tayo sa mga anthology. In na in ngayon ang speculative fiction. Sisiw na 'yun sa'tin.

NATO

Five hundred pesos at complimentary copy ng libro lang ang mapapala mo dun.

AMBET

Pera-pera na lang ba talaga tayo?

NATO

Syempre hindi. Alam mo naman kung ano ang value sa'kin ng website natin. Sige, I admit, nakakapagluho na ko ngayon dahil may income na. Pero higit dun, nakakagawa ako ng isang bagay na ikakaproud ng parents ko. College pa lang tayo, utang-uta ka na sa hang-ups kong 'to. Tapos ngayon na okay na, ipagdadamot mo naman bigla?

AMBET

Hindi ganun 'yun, Nato.

Maririnig ang FB notification sa laptop ni NATO.

NATO

Teka lang. *(itse-tsek ni NATO ang FB)* ‘Tang ina, Ambet! Mocha Uson Official likes dikasure.com! Ni-like ni THE MOCHA USON ang page natin! Lamang na tayo ng isang like kay Jessica Soho! ‘Tang ina ang suryal! Puputaktihin lalo tayo ng likers dahil dito. Ipa-follow na rin tayo ng mga supporter ni Duterte.

Hindi sasabayan ni AMBET ang excitement ni NATO.

NATO

Ang bangis natin, tol! ‘Tang ina! Mocha Uson! *(mararamdaman ang paghilab ng tiyan)* Teka, nadali na rin yata ako nung gatas.

Papasok sa CR si NATO.

NATO

(off stage) ‘Tang ina, Ambet! Hindi mo binuhusan si Rizal!

Ngingisi si AMBET. Tutunog ang cellphone niya. Agad niyang babasahin ang text. Magrereply siya. Tapos ay pupunta sa mesa ni NATO. Sisimsimin niya ang mga kontrata at susubukang hanapin ang iba pa. Mayamaya, may kakatok. Bubuksan ni AMBET ang pinto. Maririnig ang

sound na parang choir of angels. May smoke effect pa. Naroon si KLIYENTE 2, isang ministro ng Iglesia ng Hari.

KLIYENTE 2

Magandang gabi, kapatid.

Matutulala si AMBET nang ilang segundo.

KLIYENTE 2

Hindi mo man lang ba aanyayahang pumasok ang ministro ng ebanghelyo?

AMBET

(matatauhan) Tuloy po kayo.

KLIYENTE 2

Kapatid, ako na mismo ang nagsadya dahil hindi mo sinasagot ang mga email ko. Batid mo ba na ang hindi pagtugon ay tahasang pandudusta sa tunay na iglesia?

AMBET

Medyo busy po kasi talaga. *(babalikan ang paghahanap sa mesa ni NATO)* Kita n'yo naman, 'di na namin alam kung alin ang uunahin.

KLIYENTE 2

Parating prayoridad ang paglilingkod sa Ama. Wala ka sa tamang daan kung hindi siya ang nauuna.

AMBET

E ano po ba'ng gusto nyong ipabago dun sa nirelease nating write-up? Approved naman na po 'yun ng council n'yo.

KLIYENTE 2

Kapatid, may ilang detalye na nais sana naming idagdag sa teksto. (*dudukutin ang papel sa bulsa*) Nagdala na ako ng sarili kong kopya.

AMBET

Ministro, pwede po bang bumalik na lang—

KLIYENTE 2

Nababahala kasi ang ilang mga kaanib sa listahang inilathala natin. Masyado kasing lapit sa katotohanan. Kung ang pinapakay natin ay ang pagpapakilala sa mundo ng iglesia, kailangang gawin natin ang ilang rebisyon. (*mapupuna na hindi siya pinapansin ni AMBET*) Kapatid, nasa harap ka ng ministro ng ebanghelyo. Sa akin lang dapat ang atensyon mo. Heto. (*iaabot kay AMBET ang papel*) Basa!

AMBET

(bantulot na magbabasa) Five Guinness Book of World Records na Nasungkit ng INH. Number 1, pinakamalaking indoor arena sa buong mundo. Taong 2014, ginulat ng Iglesia ng Hari ang Pilipinas sa pagbubukas ng Philippine Arena sa Bulacan. Kasabay ng pagdiriwang ng ika-isandaang taong pagkakatatag ng kapatiran, pinasinayaan ang arena na kayang maglaman ng limampung libong tao.

KLIYENTE 2

Ang boring! Idagdag mo dyan na ang arena ang itinalaga ng Ama na magiging tanggulan ng mga maliligtas. Na ang arena ang hinirang na lugar kung saan mabubuklod ang bayan ng Diyos sa oras ng paghuhukom. Tuloy!

AMBET

Number 2, pinakamaraming bilang ng taong lumahok sa sabayang pag-awit. Tinipon ng INH ang mga myembro ng kanilang choir upang umawit ng papuri sa Ama. Ito ay pagpapakita ng bigkis ng mga tinawag upang maging bahagi ng isang katawan.

KLIYENTE 2

Ang sagwa! Palitan natin. Sabihin mo na nasaksihan at narinig ng mga taga-Guinness ang tila isang pulutong ng anghel. Sila'y kinilabutan na para bang pinukaw ng banal na espiritu ang kanilang damdamin. Tuloy!

AMBET

Number 3, pinakamalaking grupo na nagdulot ng traffic sa Metro Manila sa loob ng sampung

oras.

KLIYENTE 2

Palitan natin 'yan, kapatid. Gawin nating pinakamalaking kawan ng Ama ng kumilos para sa iisang adhika.

AMBET

Pero talaga naman pong pinagtraffic nyo ang EDSA. Ako nga, naglakad mula Guadalupe hanggang Kamuning!

KLIYENTE 2

Makinig ka sa ministro, kapatid. Palitan natin.

AMBET

Ayoko!

KLIYENTE 2

PALITAN MO!

Saktong paglabas ni NATO mula sa CR.

NATO

Ministro? Ano pong problema natin?

KLIYENTE 2/AMBET

Ayaw sundin ng kaibigan mo ang mga rebisyon ng ministro ng ebanghelyo. / Gusto niyang baguhin ‘yung sinulat ko. Gusto niyang magsinungaling ako.

NATO

Ambet naman. Kliyente natin si ministro.

AMBET

Kliyente lang siya, tayo ang may-ari ng website. Kaya may say ako kung ano ang lalabas dun.

NATO

Sira ulo ka ba? Hindi natin makukuha ‘yung full payment kung hindi natin siya susundin.

AMBET

Wala na kong pakialam kung magbabayad siya o hindi.

NATO

Ako meron!

AMBET

E ‘di ikaw ang magrevise!

KLIYENTE 2

Kapatid, sa ginagawa mong ‘yan, hindi ka maliligtas sa poot ng Ama.

NATO

Ambet, kanina pa ko nagtitimpi sa kagaguhan mo ha.

AMBET

Kanina mo pa rin ako hindi iniintindi. Sinabi nang ayoko na ng maduming trabaho.

NATO

‘Tang ina naman, tol. Ang labo ng trip mo eh! Ano ba’ng tingin mo sa sarili mo? Bayani? Santo?!

AMBET

Basta ayoko nang manloko ng tao!

KLIYENTE2

Kung ‘yun ang hangad mo, umanib ka sa amin at ipagpatuloy ang mga Gawain ni Elias.

AMBET

Ba’t ako sasama sa ministrong gumagawa ng kwento para pagtakpan ang isyu ng samahan nyo?

KLIYENTE 2

Sinasabi ko sa’yo, kapatid, mananagot ka sa Ama!

NATO

Sumosobra ka na, Ambet! Kung gusto mong magpaka-righteous, ‘wag mong idamay ang negosyo ko!

AMBET

Negosyo NATIN! May ownership din ako sa dikasure.com.

NATO

Pwes panindigan mo ‘yang ownership mo! Umayos ka at gawin mo’ng trabaho mo.

KLIYENTE 2

Tapusin mo ang iyong takbuhin, kapatid. Hawakan mo nang buong giting ang pananagutan mo sa Ama.

AMBET

Ayoko na, Nato.

NATO

Madedemanda ka ng breach of contract, gago.

AMBET

(ipapakita ang mga naipong kontrata) Isang palito ng posporo lang ang katapat ng mga kontrata

mo.

Saglit na matatahimik ang lahat.

NATO

Sa lahat ng matalino, ikaw ang bobo. Kahit sunugin mo ‘yan, may kopya pa rin ang mga kliyente.

KLIYENTE 2

(mariing pipikit, nasa ibabaw ng dibdib ang mga kamay) Dakilang Diyos, nawa po ay mapuspos ng liwanag ang hinirang mong anak. Matanto nawa niya na ang kanyang talent ay maaaring magsilbing sulo sa dilim ng gabi. Patuloy nawa siyang magpunyagi upang makamtan niya ang kaligtasan. *(saglit, didilat)* Mga kapatid, mauuna na ko. Tiyakin ninyong bukas ay tapos na ang rebisyon ng teksto.

Lalakad paalis si KLIYENTE 2. Mapapahiyaw si AMBET sa frustration kasabay ng paghagis sa hawak na mga kontrata.

AMBET

Hindi ito ang gusto ko!

NATO

Kung gusto natin ang nasunod, malamang baon na tayo sa utang kung kani-kanino.

AMBET

Ang sama-sama natin, Nato.

NATO

May mas masama pa sa'tin. Tandaan mo 'yan.

AMBET

Bakit tayo papayag na maging kagaya nila?

NATO

Dahil ayaw nating matulad sa iba na pinili ngang maging tama, wala namang laman ang bulsa.

AMBET

'Di ka ba natatakot sa karma?

NATO

'Tang ina, tol, totoong buhay 'to. Hindi pelikula ni Kris Aquino.

Magriring ang cellphone ni AMBET. Saglit niyang tititigan ang screen ng telepono, tapos ay ika-cancel ang tawag. Saglit silang 'di mag-iimikan. Iikot ni AMBET ang paningin sa paligid.

NATO

Gising-gising, tol. Walang future sa 'tang inang "serve the people".

AMBET

Gising na ko, Nato. Tapos na ko.

Lalabas si AMBET. Matatameme si NATO, hindi makapaniwala sa naging takbo ng usapan.

Inom sana siya ng gatas pero ubos na. Pupulutin niya ang mga nagkalat na papel. Mayamaya, maririnig niya ang mga boses mula sa labas.

LALAKI

(off stage) 'Wag mo nang subukang manlaban. Pasok! Dali!

AMBET

(off stage) Saglit lang, boss, ma'am. Wala akong atraso sa inyo.

LALAKI

(off stage) Buksan mo'ng pinto!

Bubuksan ni AMBET ang pinto. Nakatutok sa kanya ang baril ng LALAKI. Gulat na mapapaatras si NATO.

NATO

Hoy, trespassing kayo!

Papasok si KLIYENTE 3. Magtatanggal ng eyeglasses at nakatalukbong na shawl sa mukha.

Secretary siya ni Imee Marcos. Sexy ang bihis, may dalang malaking signature bag.

KLIYENTE 3

(ila-lock ang pinto) Chill lang kayo, mga pogi. Wala kaming balak na masama.

AMBET

Anong wala?! E may baril ‘tong alalay mo.

KLIYENTE 3

For security purposes. *(titingnan sina NATO at AMBET from head to toe)* So, you’re Nato and Ambet of dikasure.com?

NATO/AMBET

Oo. / Hindi!

KLIYENTE 3

Oh, I thought you’re an amazing pair. Bakit walang unity? *(saglit)* Anyway, let me get straight to the point at may next appointment pa ko. You know me naman siguro. Ako ang secretary ni Congresswoman Jaimee ng Ilocos. I’ve heard, yung website ninyo ang pinakamaingay ngayon sa social media. Obvious naman siguro, I want you to write something for me.

AMBET

Sarado na kami! Bunkrupt!

LALAKI

‘Pag ‘di ka tumigil, ‘yung bibig mo ang isasara ko!

KLIYENTE 3

Calm down, guys. No need for violence. (*sopistikadang uupo*) Mabilis lang naman ‘to, boys. Kagagaling ko lang kasi sa theatre. I tried to watch that chipipay festival of Martial Law plays. My god, I had to disguise pa nga para makanood. Tapos ang crappy naman nung show. And I was so shocked! They fabricated stories na makakasira sa image ng family ni Congresswoman. Worst, the hashtag never again is trending worldwide as we speak because of that stupid production.

AMBET

Buti nga sa inyo!

Ilalapit ng LALAKI ang baril sa mukha ni AMBET.

KLIYENTE 3

Now, I want you to write an article stating how great and how noble the former president was. And since it’s an urgent job, nagprepare na ko ng outline. (*kukuhanin ang papel sa bag, iaabot*

kay NATO) Just follow that. (kukuhanin sa bag ang nga Ilocos goods) Nagdala na rin ako ng longganisa, empanada, at bagnet. Specially made for you para ganahan kayong mag-work. Do it quick ha, then ibibigay ko rin ang cheke ora mismo. Teka, may Ilokano ba sa inyo?

Hindi iimik sina AMBET at NATO.

LALAKI

Tinatanong kayo ni Madam!

KLIYENTE 3

Adda Ilokano kada kayo nga duwa? [May Ilokano ba sa inyong dalawa?]

NATO

Siyak, Ilokano ak. [Ako po.] Taga-Batac ang tatay ko.

KLIYENTE 3

Great! At least I know I have your loyalty. Nowadays kasi, nagkalat na ang mga traydor. (*saglit*)

Oh, dali. Sulat na!

Pwersahang iuupo ng LALAKI sa harap ng iisang laptop sina AMBET at NATO. Magtitinginan sila, magpapakiramdaman.

KLIYENTE 3

Kaya ba in 30 minutes? Max?

LALAKI

Kilos!

Babasahin ulit ni NATO ang outline tapos ay magsisimulang mag-type.

AMBET

Nato, may kasunduan tayo.

NATO

(naka-focus lang sa screen) Ayaw mo na sa dikasure.com, 'di ba?

AMBET

Lalabas pa rin dyan ang pangalan ko.

NATO

Pangalan o buhay mo? Mamili ka.

AMBET

'Tang ina! Alam mo'ng tawag dito, Nato? KARMA!

NATO

Imbes na dumadada ka dyan, tumulong ka na lang.

AMBET

Ayokong itakwil ng lolo't lola ko mula sa hukay.

NATO

Eh di samahan mo na lang sila, gago.

KLIYENTE 3

Okay na?

LALAKI

(sisilipin ang laptop) Nakakaanim na linya pa lang, Madam.

Tutunog ang cellphone ni AMBET, dalawang magkasunod na text.

KLIYENTE 3

Is that mine? Baka hinahanap na ko ni Sir Bonget.

LALAKI

Hindi, Madam. Cellphone nitong ayaw magsulat.

KLIYENTE 3

(lalapitan si AMBET) Naku, abala talaga sa trabaho ‘yang gadget eh.

LALAKI

Sa bulsa ng short, Madam.

Akmang dudukutin ni KLIYENTE 3 ng cellphone, papalag si AMBET.

LALAKI

Isang kibot mo pa, tutuluyan na kita!

KLIYENTE 3

Give it to me na. Ibabalik ko rin mamaya.

Bantulot na ibibigay ni AMBET ang cellphone. Tutunog ulit, isa pang text.

KLIYENTE 3

Mukhang may urgent concern ‘yung katext mo ha. Ang kulit. Hmmm, wait. Let me check it for you. I’ll just read na lang.

AMBET

‘Wag mong pakialaman ‘yan!

KLIYENTE 3

Sssh. Nagko-concentrate yung friend mo oh. *(kakalikutin ang cellphone ni AMBET)*

AMBET

‘Tang ina, sinabi nang ‘wag eh!

KLIYENTE 3

Oh, anonymous sender. Sabi niya, “Nasan ka na? Akala ko ba saglit ka lang dyan? Paubos na foods. Dito na yung kontrata mo. Aprub na ‘yung gusto mong sahod at publication grant.” UYY! Good news ito ha! *(itutuloy ang pagbabasa)* “Dito na rin si boss Teody Agoncillo. Intay ka. Papainom yata. Pawelcome sa’yo sa sulatingbayan.com.”

Nanginginig sa galit na titingnan ni NATO si AMBET. Halos lumubog naman sa lupa si AMBET.

KLIYENTE 3

Oh, dali! May naghihintay pala sa’yong inuman. Pero later mo na replyan ha. Finish that first.

NATO

(ibabalik ang tingin sa screen) Putang ina ka! Traydor! Sinungaling kang hayop ka!

AMBET

Sasabihin ko din naman sa’yo, Nato.

NATO

May nalalaman ka pang guilty, ‘tang ina ka. ‘Di ko alam na magaling ka palang umarte.

AMBET

Hindi ko pa naman—

NATO

‘Kala mo kung sino kang malinis! Traydor ka. Ako mismong babaril sa’yo! ‘Tang ina ka!

KLIYENTE 3

Boys, later na kayo mag-away, please. Can I hear the first paragraph muna?

Hindi iimik ang dalawa.

KLIYENTE 3

Kabagis, mabalin nga basaem ti umuna nga paragraph. [Kabayan, parinig nung first paragraph, please.]

LALAKI

Hoy! Mga bingi ba kayo?!

Aagawin ni NATO ang baril ng LALAKI. Itututok niya it okay AMBET.

NATO

Hayop ka, Ambet! Ni sa panaginip hindi ko naisip na magagawa mo sa'kin 'to!

LALAKI

Ibalik mo sa'kin 'yan, bata! Hindi 'yan laruan.

Ipuputok ni NATO ang baril sa dingding. Mapapasigaw si KLIYENTE 3.

KLIYENTE 3

Ukinnam! (*lalapit sa laptop*) Nai-save n'yo ba 'tong sinusulat n'yo? Control S! Control S!

NATO

(tututukan ng baril ang LALAKI) Lumayas na kayo kung ayaw n'yong madamay!

KLIYENTE 3

Hindi ako aalis hangga't hindi n'yo natatapos ang pinapasulat ko. So please, kumalma kayo.

Mga ungas!

AMBET

'Tol, hindi natin kailangan umabot sa ganito.

NATO

Walang ganito kundi mo ko tinarantado, gago! Gagawa ka pa ng kwento na napapanaginipan mo sina Ninoy at Cory. Ang galing mo talagang writer, e.

AMBET

Walang imbento sa mga sinabi ko sa'yo. Totoong ni-rei gun ako ni Ninoy!

KLIYENTE 3

Weh? Anong itsura nila sa panaginip mo?

AMBET

Kulay dilaw!

Ipuputok ulit ni NATO ang baril sa dingding.

AMBET

‘Wag mong sirain ang apartment! Hindi natin makukuha ‘yung 2 months advance!

NATO

(itututok kay AMBET ang baril) Wala akong pakialam! Pa’no mo nasikmurang ipagpalit ang kaibigan sa kwarta? ‘Tang ina! Akala ko kilala kita.

AMBET

‘Tol, pag-usapan natin, please.

NATO

‘Wag mo kong tawaging ‘tol, hayop ka! Mas masahol ka pa sa mga amo ng babaeng ‘to!

KLIYENTE 3

Hoy! Hindi ko gusto ang tabas ng dila mo, pogi.

May makukuhang gunting sa mesa ang LALAKI. Itututok niya ito sa leeg ni AMBET.

LALAKI

Putang ina ka, ibaba mo ‘yan kundi gigripuhan ko ‘tong kaibigan mo!

NATO

E di gripuhan mo, gago! Wala akong kaibigan na ipinagbibili ang kaluluwa!

KLIYENTE 3

(hahampasin ng bag ang LALAKI) ‘Wag ka na ngang makisawsaw! ‘Pag ‘yan nadali mo, pati tayo makakalaboso.

Papakawalan ng LALAKI si AMBET.

AMBET

Nato, hindi naman kita iiwan sa ere. Kapag nandun na ko, pwedeng pwede kitang kunin.

Magkakatrabaho pa rin tayo.

NATO

‘Tang ina! Anong klaseng logic meron ka? ‘Kala ko ba matalino ka?!

AMBET

Matutulungan tayo ni Sir Teody. Marami silang inaalok na perks. Makikinabang ka rin.

NATO

Perks?! Nasilaw ka sa perks?! Naisip mo ba na may mga kliyente kang tatakbuhan? Na bago mo pa maenjoy ‘yang pinagmamalaki mong perks, malamang sa malamang naipapatay ka na nila!

KLIYENTE 3

(kay AMBET) Makinig ka sa kanya! Gunggung! Pwede ba, itigil n’yo na ang bangayan dahil sayang ang oras!

NATO

(kay KLIYENTE 3) Itikom mo ‘yang bunganga mo!

KLIYENTE 3

Ingrato! Kakampi mo nga ako, di ba?!

AMBET

O sige! Iputok mo! Iputok mo para magkaalaman na kung sino sa’tin ang traydor.

LALAKI

Bata, kung babarilin mo, barilin mo na. Ang dami mong satsat!

NATO

‘Wag kang atat!

LALAKI

Kalabitin mo na!

NATO

Ikaw ang humingi nito, Ambet. Kung ilalaglag mo ko, sisiguraduhin kong isasama kita.

Ipuputok ni NATO ang baril pero agad siyang madadamba ng LALAKI. Sa dingding tatama ang bala. Maaagaw ng LALAKI ang baril.

LALAKI

(itututok kay NATO ang baril) Putang ama ka! Mas madaldal ka pa kay Cristy Fermin!

KLIYENTE 3

(hahampasin ng bag ang LALAKI) Sinabi ng tama na ‘yang barilan! Matagal pa ang New Year!

Magsulat na kayo!

Tatakbo si NATO papunta sa pinto pero agad na magpapaputok ang LALAKI. Maitutulak ni AMBET si NATO kaya siya ang tatamaan sa braso.

KLIYENTE 3

UKI TI INAM! Hindi ka ba marunong umintindi?!

LALAKI

(lalapitan sina NATO at AMBET) Pupuruhan ko'ng bumbunan n'yo kapag hindi kayo pumirmi!

Hindi makakalaban ang dalawa. Dahan-dahan silang tatayo. Aalalayan ni NATO si AMBET na hindi alintana ang dumudugong braso.

LALAKI

Dali! Kilos!

Sesenyas si AMBET kay NATO na ayos lang siya. Babalik sila sa mesa. Ihaharap ni KLIYENTE 3 kay NATO ang laptop.

KLIYENTE 3

Nasan na nga ba tayo?

LALAKI

First paragraph, Madam.

KLIYENTE 3

Ah, yeah. First paragraph. Parinig nga.

NATO

(napipiyuk-piyok na babasahin ang sinulat) Ang panunungkulan ni Ferdinand E. Marcos bilang pangulo ng Pilipinas ay maringal na panahon ng kapayapaan, kasaganahan, at kaunlaran. Saksi rito ang mga magsasakang tumanggap ng ‘di matatawarang suporta ng pamahalaan. Ang mga kabataang nakatamo ng mataas na uri at antas ng edukasyon. Ang mga manggagawang kultural na namayagpag dahil sa masikhay na pagsusulong sa sining. Sa ilalim ng—

KLIYENTE 3

Wait. Kulang yung fourth sentence. Masikhay na pagsusulong ng sining NI IMELDA MARCOS.

Insert that, okay? *(tatango si NATO)* Oh, ikaw naman ang magbasa. Continue.

Unti-unting magdidilim ang entablado habang itinutuloy ni AMBET ang pagbabasa.

AMBET

Sa ilalim ng rehimeng Marcos, dinakila ang Pilipinas hindi lamang sa Asya kundi sa buong mundo. Bawat Pilipino ay nakasandig sa pangakong bukas ng pagtatatag ng isang bagong lipunan...

TABING